

may 1616.

Vuze

# EDICT DV ROY:

POVR LA PACIFICATION  
destroubles de son Royaume.

*Donné à Blois au mois de May 1616. Et verifié  
en Parlement le 13. Juin audit an.*



A PARIS,

Par ANTOINE ESTIENE, Premier  
Imprimeur & Libraire ordinaire du Roy,  
rue S. Iacques, au College Royal,  
deuant S. Benoist.

---

M. DC. XLIV.

*Avec Privilège de sa Maiefté.*



O V I S par la grace de Dieu  
Roy de France & de Navarre,  
A tous presens & à venir,  
Salut. Considerant les grands  
maux & calamitez aduenus  
par les troubles & guerres,  
desquels nostre Royaume a  
esté depuis quelque temps, &

est encores de present affligé : & preuoyant la  
desolation qui pourroit cy-aprés aduenir, si par  
la grace & misericorde de nostre Seigneur lesdits  
troubles n'estoiēt promptement pacifiés : N o u s  
pour à iceux mettre fin, remedier aux afflictions  
qui en procedent, remettre & faire viure nos  
subjets en paix & vnion, repos & concorde,  
comme tousiours a esté nostre intention : Apres  
auoir sur ce pris l'Auis de la Reyne, nostre  
tres-honorée Dame & Mere, des Princes, Ducs,  
Pairs, Officiers de nostre Couronne, & autres  
Seigneurs & notables personages de nostre  
Conseil, estans prez de nous : Auons par cestuy  
nostre Edict perpetuel & irreuocable, dit, statué  
& ordonné, disons, statuons & ordonnons ce qui  
s'ensuit: I.

P R E M I E R E M E N T, que la memoire de

A ij

4

toutes choses passées d'une part & d'autre, en cestuy nostre Royaume, depuis le premier iour de Iuillet dernier, que les presens troubles & mouuemens de guerre ont commencé; & à l'occasion d'iceux iusques à la publication qui sera faite dans les Prouinces, par nos Gouverneurs & Lieutenans Generaux en icelles, de l'acte de la Paix; demeurera esteinte & assoupie, comme de chose non aduenue; & ne sera loisible, ny permis à nos Procureurs Generaux, ny autres personnes publiques, ny priuées quelconques, en quelque temps, ny pour quelque cause que ce soit, en faire mention, procez, ny poursuite en aucune Cour, ny Iurisdiction.

II.

DEFENDONS à tous nos sujets de quelque estat & qualité qu'ils soient, d'en renouveler la memoire, s'attaquer, iniurier, ny prouoquer l'un l'autre par reproche de ce qui s'est passé, en contester ou quereller, ny s'outrager, offenser de fait ou de parole: Mais leur ordonnons se contenir & viure paisiblement ensemble, comme freres, amis & concitoyens, sur peine aux contreuenans d'estre punis comme infracteurs de Paix, & perturbateurs du repos public.

III.

ORDONNONS que la Religion Catholique, Apostolique & Romaine, sera presentement remise & reestablie en tous les lieux & endroicts où l'exercice d'icelle pouuoit auoir esté intermis, à l'occasion des presens mouuemens: Defendans à toutes personnes de quelque estat, qualité &

condition qu'ils soient, sur les peines que dessus, de ne troubler, molester, ny inquieter les Ecclesiastiques en la celebration du service diuin, iouissance & perception de leurs dixmes, fruiçts & reuenus de leurs Benefices, & en tous les autres droiçts & deuoirs qui leur appartiennent : mesmes leur laisser la libre demeure & habitation dans leurs maisons, ausquelles ils souloient demeurer auparauant ces mouuemens. Voulans que tous ceux, qui dorant iceux se sont emparez des Eglises, biens & reuenus desdits Ecclesiastiques, & qui les detiennent & occupent, leur en delaisent l'entiere possession, & paisible iouissance, avec tels droiçts, libertez, & seuretez qu'ils auoient auparauant.

#### IV.

COMBIEN que par le soin & prudent aduis de la Royne, nostre tres-honorée Dame & Mere, nous ayons cy-deuant commandé & ordonné tres-expressement de bouche, & par escrit, à nostre Cour de Parlement, & à nostre Procureur General, de faire toutes poursuites & recherches de ceux qui ont participé au detestable paricide du feu Roy, nostre tres-honoré Seigneur & Pere (que Dieu absolue,) Nous ayant esté neantmoïs représenté, que contre nostre intention aucuns de nos Officiers sont reputes auoir vsé de nonchalance & negligence en ladite recherche, Nous ordonnons derechef, & tres-expressement enioignons à nostredite Cour de Parlement de Paris, & à nostredit Procureur General, de receuoir tous aduis, memoires & en-

seignemens qui leur seront apportez sur ce sujet, pour faire la recherche, poursuite & punition de cét execrable crime: leur mandant de faire en cét endroit, ce qui est du deü de leur charge, pour l'exacte execution de cette nostre volonté. Et afin de destourner les esprits de nos subjets, de penser à l'aduenir à ces damnables actes & impietez, nous escrirons à tous les Euesques de nostre Royaume, de faire publier chacun en leurs Dioceses, le Decret du Concile de Constance, qui fait mention de la seureté de la vie des Roys & Princes souuerains.

## V.

Et encores que la surseance de l'execution des Arrests de nostre Cour de Parlement de Paris, portée par l'Arrest de nostre Conseil du 6. Ianuier 1619. & les Declarations que nous auõs enuoyées hors nostre Royaume, ayent esté par nous ordonnées en la preiënce de la Roïne, nostre tres-honorée Dame & Mere, des Princes, Ducs, Pairs de France, Officiers de nostre Couronne, & autres principaux Seigneurs de nostre Conseil, estans prés de nostre Personne, avec grande connoissance de cause, meure deliberation, & pour bonnes & importantes considerations & raisons; afin de conseruer & entretenir suiuant l'exemple & la prudence du feu Roy, nostre tres-honoré Seigneur & Pere, pour le bien & grandeur de nostre Royaume, toute bonne correspõdance, paix, amitié & intelligẽce avec nostre Tres-Sainct Pere le Pape & le S. Siege Apostolique, sans pour cela auoir fait aucune

Declaracion preiudiciable, ny des- aduantageuse en sorte quelconque à nostre autorité Royale, ny à nostre Puissance souueraine, & à l'indépendance de nostre Couronne ; dont par le prudent Conseil de nostredite très-honorée Dame & Mere, nous auons tousiours esté & serons plus jaloux & soigneux protecteurs que tous autres, ainsi que le requiert & nous y oblige nostre interest : Neantmoins nous ordonnons que ladite surseance portée par l'Arrest de nostredit Conseil du 6. Ianuier 1615. soit leuée, pourueu & à la charge aussi que ce qui reste à executer de l'Arrest ou deliberation de nostredite Cour de Parlement, du 2. dudit mois de Ianuier y mentionné, demeurera sans execution.

## V I.

Et bien que nous ayons eu soin de commander à ceux de nostre Conseil de travailler à la Responce qu'il nous conuient faire aux Cahiers qui nous ont esté presentez par les Estats Generaux de nostre Royaume, & que mesmes ils y ayent desia beaucoup aduancé, en ayant faict le rapport d'une partie en nostre presence ; Neantmoins pour tesmoigner à tous les Ordres d'iceluy, le desir que nous auons d'y pouruoir promptement, & satisfaire autant qu'il nous sera possible à leur contentement ; Nous voulons & entendons qu'il soit cy-apres travaillé incessamment à la responce desdits Cahiers ; en sorte qu'elle soit expediee dans trois mois apres la publication des presentes. V I I.

V O U L O N S aussi que le premier Article du

Cahier du Tiers Estat nous soit lors représenté, pour estre par nous pourueu sur le contenu en iceluy, avec l'aduis des Princes de nostre Sang, autres Princes, Ducs, Pairs de France, Officiers de nostre Couronne, principaux de nostre Conseil, & aucuns de nos Cours de Parlement qui y seront par eux enuoyez, suiuant le commandement que nous leur ferons d'y deputer pour deliberer sur ledit Article.

### VIII.

DECLARONS suiuant les anciennes Loix du Royaume, renouuellées par l'Ordonnance faite sur les remonstrances des Estats de Blois, en l'année 1576. Qu'aucuns estrangers ne seront à l'aduenir admis és Offices de nostre Couronne, ny és Gouvernemens de nos Prouinces & places fortes, charges & dignitez militaires, Offices de Iudicature & des Finances, Dignitez & Prelatures Ecclesiastiques, & autres fonctions publiques: sinon que en consideration de leurs signalez & recommandables seruices, & de leurs qualitez & merites, & pour la reputation de nos affaires & grandeur de nostre Couronne, il y soit par nous derogé, ainsi qu'il a esté souuent fait par les Roys nos predecesseurs, que l'on a veu par experience en auoir esté vtilement seruis.

### IX.

VOLONS & entendons, comme nous auons tousiours fait, que les Cours Souueraines de nostre Royaume, soient maintenues & conseruées en la libre & entiere fonction de leurs charges, & en l'autorité & Iurisdiction qui leur a esté

9

a esté donnée par les Rois nos predecesseurs.

X.

P O U R pouruoir aux Remonstrances qui ont esté faites par nostre Cour de Parlement de Paris, en ce qui concerne la Iurisdiction à eux attribuée, tant par leur établissement, que Ordonnances des Rois nos Predecesseurs, sera fait vne Conference, suiuant ce qui a esté cy-deuant proposé des principaux de nostre Conseil, & de nostre dite Cour de Parlement, nonobstant l'Arrest de nostre dit Conseil du 23. May dernier, lequel demeurera sans effect.

X I.

V O U L O N S & ordonnons que tous ceux qui ont esté pourueus par les Rois nos Predecesseurs, ou par nous, de Charges, Estats, Offices & Dignitez, & qui en ont esté depossedez, ou qui sont en quelque sorte que ce soit, troublez en la fonction & exercice d'iceux; contre les Loix du Royaume; y soient remis & reestablis, pour en iouir par eux, suiuant & conformément aux prouisions & pouuoirs qui leur en ont esté expediez, s'en acquittans de leur part, comme ils sont tenus de faire par leurs prouisions, & les sermens par eux prestez, & suiuant nos Edicts & Ordonnances.

X I I.

N' E N T E N D O N S que desormais les charges de nostre Maison, des Roynes nos Mere, & Frere, Gouuernemens de nos Prouinces & Villles, Lieutenances Generales desdites Prouinces, Capitaineries de Places & Chasteaux, & toutes charges Militaires, & autres qui n'entrent point



en nos Parties Casuelles, soient venales: Ce que nous interdisons & defendons à tous generalement quelſconques.

## XIII.

ET afin que nous ayons plus de moyen de recompenser la vertu & les merites de ceux qui nous auront bien & fidelement seruis, Nous declarams que nous n'entendons donner à l'aduenir aucunes suruiuances ny reſerues d'aucuns Estats & Offices, charges & dignitez, soit de nostre Couronne ou de nostre Maison, ou autres: comme aussi des Gouvernemens des Provinces & Villes, Lieutenances Generales, & Capitaineries de Places: Voulans que si par importunité ou surprise, aucunes Lettres ou Prouisions en estoient cy-aprés expediees, elles soient reuokées, sans que l'on y ait aucun esgard.

## XIV.

VOLONS & entendons que les Edicts de Pacification, Declarations & Articles secrets, verifiez en nos Cours de Parlement, comme aussi les Breuets & Responſes de Cahiers faits par le feu Roy, nostre tres-honoré Seigneur & Pere, & Nous, en faueur de nos ſubjets de la Religion pretenduë reformée, soient obseruez & executez, & qu'ils en iouissent ſelon leur forme & teneur.

## XV.

ET dautant que Maistre Pierre Berger, Conseiller en nostre Cour de Parlement de Paris, qui estoit pourueu d'un des six Offices, qui par le 30. Article dudit Edict, furent affectez à ceux de ladite Religion pretenduë reformée, a fait profession

de la Religion Catholique ; Nous auons creé & erigé, creons & erigeōs de nouveau, vn Office de Conseiller en nostredite Cour de Parlement de Paris, aux mesmes gages, droicts, priuileges, auctoritez & fonctions que les autres : & lequel Office (ainsi que dit est) par nous presentement creé, nous affectons à ceux de ladite Religion pretenduë reformée, au lieu de celuy que tient le- dit Berger, & dont nous ferons pouruoir vn per- sonnage de ladite Religion pretenduë reformée, suffisant & capable, suiuant la forme portée par le 50. des Articles particuliers accordez à Nan- tes à ceux de ladite Religion.

## XVI.

V O U L O N S & entendons que l'exercice de ladite Religion pretenduë reformée, soit remis & restably aux lieux où il pourroit auoir esté dis- cōtinué ou interrompu depuis ledit premier iour de Iuillet, & à l'occasion des presens mouuemēs, ainsi & en la mesme forme qu'il estoit aupara- uant.

## XVII.

E T afin qu'il ne soit douté de la droite inten- tion de nostre tres-cher Cousin le Prince de Condé, & ceux qui se sont ioints avec luy, Nous declaronz que nous reputons & tenons nostredit Cousin le Prince de Condé, pour nostre bon pa- rent & fidel sujet & seruiteur ; comme aussi les autres Princes, Ducs, Pairs, Officiers de nostre Couronne, Seigneurs, Gentils-hommes, Villes, Communautéz & autres, tant Catholiques, que de la Religion pretenduë reformée, de quelque qualité & condition qu'ils soient, qui l'ont assi-

sté, & se sont ioints & vnis avec luy, soit auant, ou durant la suspension d'armes, y compris mesmes les Deputez de ladite Religion pretenduë reformée, nagueres assemblez à Nismes, & de present en nostre Ville de la Rochelle, pour nos bons & loyaux subjets & seruiteurs. Et apres auoir entendu la Declaration à nous faite par nostredit Cousin le Prince de Condé, nous croyons & estimons, que ce qui a esté fait par luy & les susnommez, a esté à bonne fin & intention, & pour nostre seruice.

## XVIII.

NOSTREDIT Cousin le Prince de Condé & les autres Princes, Ducs, Pairs, Officiers de nostre Couronne & Seigneurs, tant Catholiques que de la Religion pretenduë reformée, qui l'ont assisté, & se sont ioints & vnis avec luy, soit auant ou durant la suspension d'armes, y compris mesmes les Deputez de ladite Religion pretenduë reformée, cy-deuant assemblez à Nismes; se desisteront & departiront dès à present de tous traitez, negociations, vnions, intelligences, ionctiōs, associations qu'ils pourroient auoir, tant dedās que dehors nostre Royaume, avec quelques Princes, Potentats & autres Personnes quelconques, & pour quelque cause & occasion que ce soit, & y renonceront, sans pouuoir cy-apres les continuer ny renoueller; Ce que nous leur defendons tres-expresément: Comme aussi de faire dorelnauant aucunes cottisations & leuées de deniers sans nostre permission, fortifications, enrollemens d'hommes, Congregations & Assem-

blées, autres que celles qui sont permises par nous ou nos Edicts, & par les Loix & Estats de nostre Royaume: Letout sur peine d'estre punis rigoureusement, comme contempteurs & infracteurs de nos Ordonnances.

# X I X.

V O U L O N S & entendons que nostredit Cousin, & tous lesdits Princes & autres sus-nommez & specifiez, demeurent entierement quittes & deschargez de tout ce qui s'est fait & passé, depuis le premier iour de Iuillet dernier, à l'occasion desdits mouuemens, iusques au iour de la publication qui sera faite dans les Prouinces, & par les Gouverneurs ou Lieutenans Generaux d'icelles, de l'Acte de la Paix qui y sera enuoyé, sans que cy-apres ils en puissent estre recherchez ny inquietez, pour quelque cause & pretexte que ce puisse estre; soit pour la prise des armes, port d'icelles, enrollemens & conduite de gens de guerre, establissement & entretènement des Garnisons, entreprises, sieges & prises de Villes, Places, Chasteaux, & Maisons fortes, par assault, composition ou autrement, fortifications, demantelemens & demolitions d'icelles, pillages & bruslemens de Faux-bourgs & Villages, Eglises & Maisons, commandez & aduouiez par les Chefs, selon l'ordre & necessité de la guerre, equippage & conduite d'artillerie, prise ou fonte d'icelle, & de boulets, confection de poudres & salpestres, armement de vaisseaux sur la Mer & Riuieres; congez donnez aux Capitaines de Marine, prise & butins faits en consequence desdits

congez, sur ceux de party contraire : prise de Couriers & Messagers, de leurs paquets & lettres, mesme durant la Trefue; emprisonnement d'Officiers, ou autres personnes : establissement de Conseils generaux ou particuliers, tant pour la direction des Finances, que pour autres affaires de la guerre : Jugemens & execution d'iceux, tant Ciuils que Criminels, de Police ou Reglement; translations de Chambres de Iustice, de Generalitez, d'Electiions & Greniers à Sel; executions de mort faites par droit de guerre, par les Preuosts des Mareschaux, leurs Lieutenans, ou autres, commis & establisés armées, ou par commandement des Chefs, les formes de la Iustice non gardées : iugemens & declarations de rançons, amendes & butins: impositions de nouveaux droits & deuoirs : continuation desanciës, ou augmētation d'iceux: leuées de pionniers, estape; munitions de guerre, & magazins de viures & fourrages; coruées d'hommes pour fortifier ou abatre Places fortes ou Chasteaux : prise de cheuaux, de Nauires, de bateaux chargez de marchandises & biës, sur Mer, ou sur les Riuieres; prise & vente de biens, meubles, bagues & joyaux, & argenteries, appartenant tant aux Ecclesiastiques qu'aux particuliers; dons d'iceux : baux à ferme des immeubles; coupes & ventes de bois taillis ou de haute fustaye, à nous appartenans, ou à autres : Assemblées & tenuës de Conseils; establissement de Bureaux & Pancartes; introduction d'estrangers, infraction ou contrauention faite à la suspension d'armes, de part & d'autre, dont la

reparation n'aura esté faite ; & tout ce qui a esté fait , geré & negocié , dit ou escrit és liures , declarations & expéditions d'affaires, voyages, intelligences, traittez, associations & negociations faites par quelques personnes que ce soit , en quelque lieu & pour quelque effect que ce puisse estre, tant dedans que dehors le Royaume: Comme aussi toutes prises & leuées de nos deniers, ou des particuliers, de quelque nature que ce soit, & à quelques sommes qu'ils se puissent monter, soit en nos receptes , ou hors d'icelles , tant du Domaine, Decimes, Aydes, Tailles, Taillon, vente de Sel, prix d'iceluy, tant des Marchands, que de la Gabelle , Imposts & octrois mis sur iceluy, traittes & impositions mises sur les bleds, vins, viures & denrées , & sur toutes autres sortes de marchandises, entrans & sortans des Villes & autres lieux: prise de deniers , des deposts, consignations d'amendes, butins & rançons , & biens meubles ; saisies d'arrerages , rentes & reuenus appartenans à quelques personnes que ce soit; fructs de benefices, subfides, subuentions, contributions, emprunts sur les Villes & Bourgs, & toutes autres prises & leuées de deniers publiques ou particuliers faites , les formes accoustumées non gardées, par quelques personnes que ce soit, & generally tous actes d'hostilité, desordres & excez faits & commis par la licence & necessité de la guerre, & toutes autres choses quelconques, ores qu'elles ne soient plus particulièrement cy exprimées, faites & executées pendant leldits troubles , & qui se sont ensuinis à l'occa-

sion d'iceux, en quelque sorte & maniere que ce soit, & par qui que ce soit qu'elles ayent esté faites, avec pouuoir, charge, commandement ou adueu de nostredit Cousin, ou des Princes, Ducs, Pairs & Officiers de nostre Couronne, Chefs d'Armées, ou commandans dans les Prouinces, qui se sont joints & vnis avec luy: Defendons à toutes personnes quelles qu'elles soient, d'en faire aucune mētion, recherche, procez ny poursuite, en quelque temps que ce soit, en aucune Cour ou Jurisdiction, en general ou en particulier, soit contre nostredit Cousin, & tous autres autorisez & aduoüiez de luy, & qui ont esté employez par luy: Entendans qu'ils en demeureront entierement quittes & deschargez, comme nous les en quittons & deschargeons par ces presentes, soit que les choses susdites ayent esté faites par les Commissions, Lettres & Mandemens de nostredit Cousin, ou des autres susnommez: Imposans sur ce silence perpetuel à nos Procureurs Generaux, leurs Substituts presens & à venir, & à toutes nos Cours de Parlement, Iuges, Officiers & tous autres; sans qu'il soit besoin aux particuliers d'obtenir de nous, pour ce qui les concerne, autres Lettres que ces presentes.

### XX:

DEMEVRERONT pareillement quittes & deschargez tous ceux qui ont esté commis par nostredit Cousin le Prince de Condé, pour la direction des Finances & deniers publics; ensemble nos Officiers, tant de nos Generalitez, que des

des Elections & Greniers à Sel, & tous autres qui ont executé les Commissions & Ordonnances de nostredit Cousin, & se sont entremis par son commandement, & en vertu de ses Commissions, des leuées desdits deniers, & autres expéditions & actes de Jurisdiction, sur ce faites, és Villes qui se sont iointes & vnies avec luy, sans qu'ils en puissent estre ores & à l'aduenir inquietez, poursuiuis ny recherchez en façon que ce soit. Voulons que tout ce qui a esté par eux executé ait pareil effet, comme s'il auoit esté fait en vertu de nos Commissions.

## X X I.

V O U L O N S aussi que tous nos Receueurs Generaux & particuliers, Fermiers, ou autres Comptables, lesquels font leur demeure & residence és Villes & lieux tenus par nostredit Cousin, mesmes les Collecteurs des Paroisses & Communautéz, & tous ceux qui ont esté par luy commis & establis, ou par les autres Princes, Ducs, Pairs & Officiers de la Couronne, & autres ioints & vnies avec luy, & ayans pouuoir de luy à la leuée & distribution desdits deniers; demeurent quittez & deschargez vers nous de tout ce qui aura esté payé par eux à quelques personnes, & pour quelque cause que ce soit, en vertu de leurs Ordonnances, Mandemens & quittances; comme aussi de tous deniers qui auront esté pris par force & violence dans nos Receptes, ou hors d'icelles, des mains de nos Receueurs, Fermiers, & autres Comptables qui les auroient transportez ailleurs, sans qu'eux, leurs cautions



& certificateurs, presens & à venir, en puissent estre recherchez ny inquietez, en quelque façon que ce soit. Voulans que tout ce qui aura esté par eux payé, soit passé & alloüé en tous estats, comptes & comptereaux, en rapportant par eux pour toute descharge les Ordonnances ou quittances de nostredit Cousin, ou d'autres autorisez & aduoüiez de luy, & les actes & procez verbaux de force & contrainte, bien & deuëment certifiez : pourueu neantmoins qu'ils en baillent estat certifié d'eux, & fassent paroistre desdites quittances ou procez verbaux, au Bureau des Tresoriers de France de leur Genoralité, dont ils prendront acte dans vn mois apres la publication des presentes; lequel temps passé ils n'y seront plus receus ny admis : & cependant toutes contraintes qui pourroient estre faites par les Tresoriers de France, ou Receueurs Generaux contre lesdits Receueurs particuliers, pour le regard desdits deniers, seront sursisés.

# XXII.

VALIDONS & autorisons pour cét effect tous comptes & comptereaux qui auront desia esté rendus par lesdits Receueurs, Fermiers ou Commis, soit pardeuant nostredit Cousin, ou autres par luy commis, pour les ouïr & arrester: Ensemble les Ordonnances, Mandemens & acquits de l'employ desdits deniers, & payemens faits en vertu d'iceux, & quittances de nostredit Cousin, ou autres autorisez de luy, & qui se sont ioints avec luy, encores que l'orde de nos Finances n'ait esté gardé, sans qu'il leur soit besoin d'obtenir

d'autres lettres de validation, ny declaration de nous, que les presentes. Lesquels comptes ou comptereaux avec lesdites Ordōnances, mandemens, acquits & quittances, lesdits Comptables seront tenus porter ou enuoyer dans quatre mois en nos Chambres des Comptes, au ressort desquelles lesdites leuées & receptes de deniers auront esté faictes, sans qu'ores ny à l'aduenir lesdits Comptes puissent estre subiects à reuision ny correction, ny lesdits comptables tenus à aucune comparition pour cét effet, sinon en cas d'obmission de recepte ou faux employ; ny rendre autre nouveau compte que ceux qu'ils aurōt (cōme dict est) rendus à nostredit Cousin, ou à ceux qui auront esté ordonnez par luy pour les ouyr: nonobstant toutes deffectuositéz & manquemens de formalitez qui s'y pourroient trouuer, imposans sur ce silence perpetuel à nos Procureurs Generaux de nosdites Chambres, presens & à venir.

### XXIII.

ET pour le regard de ceux qui n'auront encores rendu leurs comptes, nous les en auons deschargez & deschargeons, attendu le peu de temps de leur maniement. Pourra neantmoins nostredit Cousin les faire compter par estat pardeuant luy, ou autres qui seront à ce par luy ordonnez pour cét effect: Lequel estat ou copie collationnée d'iceluy, ils mettront dans six mois és mains de nos Receueurs Generaux des fināces, chacun en sa Generalité, pour seruir & valoir tant à nosdits Receueurs Generaux que particuliers, &

autres Officiers comptables, pour la iustification des reprises de leurs comptes, sans que lesdits Receueurs Generaux soient tenus de la validité ou invalidité des acquits: validant pour cét effect ainsi que deüsus, toutes Ordonnances, mandemens, acquits & quittances de nostredit Cousin, & des autres Princes, Ducs, Pairs, Officiers de nostre Couronne, & autres ioints & vnis avec luy & auctorisez de luy.

#### XXIV.

Voulons & entendons que les susdits articles ayent aussi lieu pour les Maire, Escheuins, Pairs, Bourgeois & habitans de nostre ville de la Rochelle, & qu'ils demeurent deschargez de tout ce qui a esté fait par eux, geré & negocié durant ces presens mouuemens, & iusques à present, tant en ladite ville que dans le pays d'Aunis, soit pour leuée & assemblée de gens de guerre, prises de places fortes, Chasteaux & maisons dans ledit gouuernement, & confins d'iceluy, establissement des garnisons, armement des vaisseaux, prise & retention de nauires, commissions & congez donnez pour cest effect, & generalement de tous autres actes d'hostilité: comme aussi de toutes impositions & leuées de deniers, tant en ladite ville que hors d'icelle, mesme du subside par eux imposé à Rochefort sur Charante, prises de deniers publics, tant ordinaires qu'extraordinaires, de quelque nature qu'ils soyent, & pareillement des deniers de nos tailles, taillon, aydes & creuës, desquelles Maistre Iehan Royer Receueur des tailles de ladite ville auroit esté

contrainct de vuidier ses mains , ensemble des deniers qu'il sôt receus de Maistre Iacques Raizin, Receueur du domaine d'icelle , qui nous ont esté cy deuant adiugez & confisquezz par sentence du Iuge des traictes de ladite ville du 11. iour de Iuillet, 1614. dont ils demeureront deschargez, non-obstant tous dons qui en pourroient auoir esté par nous auparauant faicts à quelques personnes que ce soit , & sans que lesdits Royer & Raizin en puissent estre recherchez à present ny à l'aduenir : voulans que les quittances qu'ils rapporteront desdits Maire, Escheuins, ou autres par eux commis pour les receuoir, soient receuës en la Chambre des Comptes, & par eux lesdits deniers passez & alloüiez en vertu d'icelles sans difficulté; & cependant mettront dans les Bureaux des Tresoriers de France à Poictiers dans vn mois, estat des deniers qu'ils auront ainsi payez, pour seruir à la descharge du Receueur general pour iustification de la recepte de ses comptes: & pour le regard de ce qui a esté receu par le Receueur ordinaire des deniers communs & patrimoniaux de ladite ville, ou autres commis par eux pour receuoir lesdits deniers cy dessus specifiez, ils seront deschargez rendans compte desdits deniers ainsi receus pardeuant lesdits Maire & Escheuins, comme ils ont accoustumé faire des autres deniers de leur charge.

## XXV.

LES Commissaires & Controolleurs des guerres, Payeurs & autres qui ont esté commis

& ordonnez par nostredit Cousin, Gouverneurs des Prouinces ou commandans en icelles au fait des monstres, & payement des gens de guerre tant de cheual que de pied, qui estoient à la fuite, ou sous son autorité, & de ceux qui estoient ioincts & vnis avec luy durant les presens troubles, demeureront pareillement deschargez de tout ce qui regarde la certification des acquits & payement d'iceux, selon les rolles qu'ils en auront signez & expediez, encores que les formes n'y ayent esté gardées & obseruées.

## XXVI.

Comme pareillement ceux qui ont esté establis durant lesdits presens mouuemens, pour exercer les charges de Commissaires & gardes des viures & munitions és armées conduictes par nostredit Cousin, & autres Princes, Ducs, Pairs & Officiers de nostre Couronne, & Seigneurs tant Catholiques que de la religion pretenduë reformée, ioincts & vnis avec luy, demeureront deschargez de leur administration, & de tout ce qui s'est passé, faict & executé par eux esdictes charges, de l'ordonnance de nostredit Cousin, ou des Princes & Seigneurs, pour toutes sortes de munitions, viures, cheuaux, harnois, & autres choses leuées & exigées sous leurs noms, sans qu'ils soient responsables du faict de leurs commis, clerks, & autres officiers par eux employez, le tout en rapportant par eux dans quatre mois, declaration & certification de nostredit Cousin, ou desdits Chefs & Gou-

uerneurs, comme ils auront bien & fidellement seruy en l'exercice de leurs charges, en vertu dequoy nous les dispensons pareillement d'en rendre aucun compte en nos Chambres des Comptes.

### XXVII.

Et pource que les vefues & heritiers de ceux qui sont morts au seruice ou à la suite de nostre-dict Cousin, ou ont esté employez par luy, pourroient estre poursuiuis & recherchez pour raison des choses faictes durant lesdits presens troubles & mouuemens, & à l'occasion d'iceux, par leurs maris, ou ceux desquels ils sont heritiers, nous voulons & entendons qu'ils iouissent de la mesme descharge que les defuncts pourroient faire suiuant les articles precedens.

### XXVIII.

Ne pourra estre tenu nostredit Cousin, ny les autres Princes & Seigneurs qui l'ont assisté, & se sont ioincts & vnis avec luy, ensemble les comptables, par eux commis ou auctorisez, de payer ou faire valoir en leurs noms à qui que ce soit, ce dont pour la necessité des affaires durant lesdits presens mouuemens, & à l'occasion d'iceux, ils auront baillé leurs mandemens, lettres, rescriptions, assignations ou promesses.

### XXIX.

Et pour plus grande assurance & effect de nostre intention, nous voulons & ordonnons que tous Edicts, Lettres patentes, Declarations, faictes & publiées, Arrests, Sentences, Iuge-

mens & decretz donnez sur icelles en nostre Conseil, Cours de Parlement, & autres Cours souveraines, & en tous autres lieux & Iurisdiccions de nostre Royaume, & pays de nostre obeyllance, tant contre nostredit Cousin, que les autres Princes, Ducs, Pairs, & Officiers de nostre Couronne, Seigneurs, Gentils-hommes, Officiers, corps de Villes, Communautéz & particuliers de quelque qualité & condition qu'ils soient, tant Catholiques que de la religion prétendue réformée, qui se sont ioincts & vniz avec luy, & l'ont fuiuy, assisté & secouru, presté ayde & faueur en quelque sorte & maniere que ce soit, pendant & à l'occasion desdits présents troubles & mouuemens, comme aussi toutes poursuittes qui pourroient auoir esté faictes contre les deputez de ladite religion prétendue réformée cy deuant assemblez à Nismes, & autres pour s'estre trouuezés assemblees tenuës à Nismes & à la Rochelle, assemblees Prouinciales, & aux Conseils des Prouinces; demeurent nulles, & de nul effect & valeur, & comme tels soient rayez & tirez des Registres de nostredit Conseil, Cours de Parlemens, & autres Iurisdiccions: Ensemble toutes informations, procès verbaux, prises de corps decernées, & procédures commencées, & autres actes de Iustice faictz pour raison des choses aduenües durant & à l'occasion desdits mouuemens. Defendons à nos Procureurs Generaux, leurs Substituts, & à tous autres particuliers d'en faire aucune instance ny poursuite à l'aduenir.

XXX.

La Declaration faicte à Poictiers au mois de Septembredernier, demeurera nulle & de nul effect, comme si iamais elle n'estoit aduenüe, & sera ostée des Registres du Parlement de Paris, sans qu'elle puisse porter preiudice, ny l'exemple d'icelle estre tiré à consequence à l'aduenir, en ce qui regarde l'honneur & dignité des Princes de nostre sang, lesquels neantmoins demeureront subiects à nostre Iustice, selon les formes anciennes & accoustumées en ce Royaume pour leur regard. Et quant à l'enregistrement de ladiète Declaration, nous entendons qu'en quelque sorte qu'il ait esté faict en nostre Cour de Parlement de Paris, il soit tiré des Registres d'icelle, & pareillement que ladite Declaration, & les Arrests, Sentences & Iugemens interuenus sur icelle en toutes nos autres Cours de Parlemens, & Iurisdicions inferieures, soient aussi ostées & tirées des Registres d'icelles.

XXXI.

Comme aussi nous voulons que s'il auoit esté donné quelque Arrest en nostre Cour de Parlement de Bordeaux au mois de 1614. ou faict quelque arresté qui se trouuaist dans les Registres de ladite Cour contre nostre-dit Cousin le Prince de Condé, il soit tiré & osté desdits Registres.

XXXII.

Toutes places, villes & communautéz qui se sont joinctes & vnies à nostredit cousin le Prince

D



de Condé, & lesquelles à l'occasion des presens mouvemens pourroient estre troublées en la libre & entiere iouissance de tous leurs anciens droicts, privileges, franchises, libertez, dons, concessions & octrois, y seront remises & restablies à pur & à plain: Voulans qu'ils enioiüssent, en la mesme forme & maniere qu'ils ont bien & debieument faict iusques au premier iour de Iuillet dernier: Comme pareillement, nous voulons & ordonnons que toutes Instances, Iurisdicctions, Bureaux de receptes generales & particulieres, qui auroient depuis ledit temps, & à l'occasion de celsdits mouvemens, esté ostées & mises ailleurs, y seront remises & restablies en la mesme forme qu'ils estoient auparavant, & notamment la Chambre del'Edict de Guyenne à Nerac, cessant & reuocant tous nouveaux reestablissemens d'Eslections, qui pourroient auoir esté faicts pendant celsdits mouvemens, & à l'occasion d'iceux.

### XXXIII.

Que les habitans de nostre ville de Poitiers, tant Ecclesiastiques, Officiers qu'autres, de quelque qualité & condition qu'ils soient, lesquels à cause de ce qui est aduenue le 23. du mois de Iuin 1614. & iours suiuaus, & depuis se sont retirez de ladite ville, seront incontinent apres la publication du present Edict, remis & restablis en icelle, & en la possession & fonction de leurs charges, dignitez, benefices & offices, tant militaires que de Iudicature, de la police, des finances, & gages, ensemble tous autres qui pour

mesme sujet ont esté depossédez de quelques charges : & toutes lettres, actes procedures & informations faictes à l'encontre d'eux, par quelques Commissaires que ce puisse estre, & qui pourroient en quelque façon que ce soit toucher nostredit Cousin le Prince de Condé, ensemble l'honneur desdits habitans, de la fidelité & innocence desquels nous nous tenons bien & deüement informez, soient cassées & reuocquées comme nulles, & de nul effect & valeurs, & ostées des registres, tant du siege Presidial que de la maison de Ville, & de tous les autres lieux : Et sont tous les dessus nommez mis en nostre protection, de nos Gouverneurs & Officiers dans la Prouince, & de ceux de ladite Ville.

#### XXXIV.

Toutes procedures, informations, recherches faictes, sentences & iugemens donnez à l'encontre d'iceux, depuis ledit 23. Iuin 1614. tant pour ce qui regarde la nauigation de la riuere de Clin, construction de la ruë neufue de Poitiers, que pour les eauës & forests, demeureront nulles, & de nul effect & valeur, & les parties remises pour ce regard en l'estat qu'elles estoient auparauant, & les Arrests de nostre Conseil suiuis,

#### XXXV.

Voulons aussi, que nostredit Cousin & lesdits Princes, Ducs, Pairs, Officiers de nostre Couronne & Seigneurs, Ensemble tous Gentilshommes, Officiers Ecclesiastiques & autres,

tant Catholiques que de la Religion pretendue reformée qui l'ont suiuy & assisté, & se sont ioincts & vnis avec luy, tant auant que durant la suspension d'armes, soient restablis, maintenus & conseruez en la libre & entiere iouissance de leurs Gouuernemens, Estats, charges, offices, benefices & dignitez: ensemble des gages, droicts & reuenus qui en escherront cy apres, dont ils iouissoient auant le mois de Iuillet dernier, & ausquels ils pourroient auoir este troublez à l'occasion des presens mouuemens, sans qu'ils soient tenus ny adstrains à prendre autres prouisions ou confirmations de nous que ces presentes, ny à faire aucun remboursement ou recompense, à ceux lesquels pendant leur absence s'en sont fait pouruoir, & les ont exercées: & ce nonobstant toutes Declarations, Arrests, & Iugemens donnez contre eux, lesquels comme nuls & de nul effect demeureront cassez & reuocquez, comme nous les cassons & reuocquons, & ordonnons qu'ils soient tirez des Registres, tant de nos Cours souueraines qu'autres Iurisdicctions inferieures.

## XXXVI.

Voulons & entendons que toutes personnes tant d'une part que d'autre, soient remises comme nous les remettons & restablissons en la iouissance de tous & chacuns leurs biens, meubles & immeubles, heritages, rentes & reuenus, droicts, deuoirs, noms, raisons & actions, & quelque part qu'ils se trouuent, dont ils pourroient auoir esté depossédez, troublez ou empeschez à cause

des presens troubles & mouuemens: nonobstant tous dons qui en pourroient auoir esté faicts à leur preiudice, ou de ceux auxquels ils appartiennent, leurs veufues, enfans & heritiers: Lesquels dons, confiscations & toutes autres dispositions d'iceux, & toutes obligations & promesses sur ce faictes, Nous voulons demeurer nulles, ensemble toutes procedures, Iugemens, Sentences, Arrests, saisies & ventes faictes en execution d'iceux, & generalement tout ce qui s'en est ensuiuy.

### XXXVII.

Entendons aussi, que le present Edict ait lieu, pour nostre tres-cher frere naturel le Duc de Vendosme, & tous ceux qui l'ont suiuy & assisté, soit auant ou depuis qu'il s'est joint & vny avec nostredit Cousin le Prince de Condé, & qu'ils soient compris en la descharge generale portée par le present Edict, pour tout ce qui s'est passé pendant les presens troubles, & à l'occasion d'iceux: Et pour cet effect, Nous auons cassé & renocqué, cassons & renocquons tous Iugemens, Sentences, & Arrests qui pourroient auoir esté donnez, tant contre luy que ceux qui l'ont suiuy, soit en nos Cours de Parlement & autres lieux, & specialement l'Arrest de nostre Cour de Parlement de Rennes, du 26. Mars dernier, donné contre les sieurs d'Alegre, Saint Denys Maillot, Pierre-pont, la Rochegiffart, de Camors, de Charnacé, & la Barre-Chiuray; & celuy de nostre Cour de Parlement de Roïen, du 11. Mars dernier, donné contre

le fleur de la Bailliuiere & autres y nommez, lesquels nous auons entierement deschargez, ensemble les veufues, enfans & heritiers de ceux qui ont esté executez, de toutes les condamnations portées par iceluy : lesquels Iugemens, Sentences & Arrests, Nous voulons estre tirez des Registres, tant de nosdites Cours de Parlement de Rennes & Roüen, qu'autres lieux & Iurisdiccions inferieures, & imposons sur ce silence perpetuel à nos Procureurs Generaux, leurs Substituts, presens & à venir.

## XXXVIII.

Comme aussi, Nous renouquons tous les Arrests donnez en nostre Cour de Parlement de Rennes, contre nostredit frere naturel le Duc de Vendosme, & ceux qui l'ont suivy depuis le premier Ianuier 1614. iusques à present, tant à l'occasion desdits presens mouuemens, qu'au preiudice du traitté de sainte-Menehoust, & de l'Edict qui fut fait en consequence d'iceluy en sa faueur : Comme aussi tout ce qui s'est fait & passé és derniers Estats de nostre Prouince de Bretagne, tenus en nostre ville de Nantes en ladite année 1614. au preiudice des charges qu'il a audit pays.

## XXXIX.

L'Edict fait sur le traitté de sainte-Menehoust au mois de Iuillet 1614. sera suivy & obserué en toutes ses parties; & toutes procedures, Sentences, Iugemens & Arrests donnez au preiudice d'iceluy, demeurent nulles & comme non aduenues : comme pareillement seront renouquez

l'Arrest de condamnation donné en l'an 1615. en nostre Parlement de Rennes contre le sieur de Camors, & le Jugement donné preuostablement par le Seneschal de saint Seuer en Guyenne, contre le sieur de Stignoly & ceux qui l'ont assisté pour l'entreprise dudit saint Seuer en l'année 1614. lesquels seront titez des Registres de nostredite Cour de Parlement de Rennes & siege de S. Seuer, & de tous autres lieux & Iurisdicțiuni: voulans les condamnez estre remis en leur bonne renommée, honneurs & biens, pour en iouïr comme auparauint, & que toutes marques, vestiges & mouuemens desdites executions soient ostées.

#### XL.

Toutes Sentences, Jugemens & Arrests donnez pendant les presens mouuemens, contre les absens & non defendus d'une part & d'autre, soit en Iustice Civile ou Criminelle, en toutes nos Cours ou Iurisdicțiuni, mesmes les poursuites faictes en execution d'Arrests ou Sentences données auparauint les presens troubles, seront nulles & de nul effect & valeur, & seront les parties remises au premier estat, & ainsi qu'elles estoient ledit premier iour de Iuillet. Et pour le regard des executions de mort qui ont esté faictes de part ou d'autre à l'occasion desdits presens mouuemens, Nous voulons que la memoire de ceux qui ont esté condamnez & executez, soit restablie & restituée, & les veufues, enfans ou heritiers deschargez de toutes amendes & confiscations qui pourroient auoir esté adiugées, ensemble de tous

interests Ciuils ou despens, & que toutes marques & mouuemens desdites executions soient estees : Ce que nous voulons spécialement auoir lieu pour la condamnation & execution de mort interuenüe en la personne de Iacques de Normaille sieur des Heberts : Comme en semblable, Nous voulons que toutes poursuites faictes à l'occasion de celsdits troubles contre

Visbailly de Gien & ceux qui l'ont deliuré, demeurent nulles & de nul effect.

#### XL I.

Le temps qui a couru depuis le premier de Iuliet dernier iusques à présent, ne pourra seruir pour acquerir aucune peremption d'instance ny prescription coustumiere, legale ou conuentionnelle contre ceux qui ont suiuy nostredit Cousin, & qui se seront joints & vnis avec luy; & neantmoins toutes Sentences, Iugemens, Arrests & procédures & tous autres actes de Iustice faictes & données, tant en nos Cours souueraines qu'en toutes autres Iustices & Iurisdiccions inferieures, entre personnes de mesme party, & entre tous autres qui auront volontairement contesté & suby Iurisdiction, ne seront sujets à aucune reuocation, ains demeureront en leur force & vertu, sauf la voye de droit où le cas y escherra: Comme aussi tous Iugemens qui auront esté donnez par le Conseil estably par nostredit Cousin entre gens de mesme party, & dont l'execution s'en sera ensuiuie, tiendront : mesmes les Iugemens criminels donnez sur les Duels qui se  
sont

sont faicts, tant par nostre dit Cousin qu'aux armées & Prouinces, saules interuenans des parties ciuiles.

#### XLII.

Tous memoires, libelles diffamatoires, lettres, escrits & liures iniurieux & scandaleux demeureront supprimez : Et sont faictes defences tres-expresses à tous Libraires & Imprimeurs d'en imprimer ny exposer en vente cy-apres, & à toutes personnes d'en escrire & composer, sur peine de la vie. Enioignant à tous nos Iuges & Officiers de faire leur deuoir à la recherche & punition des Autheurs d'iceux, ensemble des contreuenans aux dites defences : Et neantmoins pour entierement esteindre la memoire des choses passees, Voulons que ceux qui pourroient estre poursuyuis & recherchez à l'occasion de tous escrits faicts & mis en vente depuis l'Edict de sainte-Menehoust en estre dechargez, comme aussi ceux qui pourroient estre detenus prisonniers sur ce sujet.

#### XLIII.

Voulons & ordonnons que poursuite & punition soit faicte des crimes & delicts commis entre personnes de mesme party pendant les presens mouuemens : Comme aussi de ceus qui seront atteints & conuaincus d'incendie & assassinats de sang froid, violemens, rauissemens & forcemens de femmes & filles, & sacrileges.

#### XLIII.

Toutes personnes estans de contraire party tant d'une part que d'autre, qui ont esté pris durant les presens mouuemens, & à causes d'iceux



ou sont detenus prisonniers en quelque lieu que ce soit, mesmes en galleres, ou qui ont esté eslargis à leur caution iuratoire ou d'autrui, seront remis en leur pleine & entiere liberté, sans pouuoir estre detenus, poursuyuis ny condamnez en aucune peine, tant corporelle, infamante que pecnniaire, dequoy nous les auons deschargez & deschargeons par ces presentes. Et quād aux prisonniers de guerre, il en sera vsé comme s'ensuit, C'est à sçauoir, que toutes personnes de contraire party, tant d'une part que d'autre qui ont esté prises durant les presens mouuemens, & à cause d'iceux ont esté iugez de bonne prise, & en vertu desdits iugemens ont payé rançon, ne pourront intenter aucune action pour ce suiet, ny pretendre aucune restitution de deniers contre qui ce soit. Tous ceux aussi qui ont esté pris & iugez de bonne prise, qui en vertu desdits iugemens ont composé & conuenu de leur rançon, à prix & sommes certaines & limitees, qui sont encore detenus prisonniers se sont obligez ou baillé caution pour le payement desdites sommes certaines & limitees, pourront estre poursuyuis pource regard, & contraints au payement d'icelles sommes. Et quant à tous autres qui n'ont conuenu ny composé de leur rançon à prix & sommes limitees, soit qu'ils soient encore detenus prisonniers ou mis en liberté sous leur caution iuratoire ou d'autrui de se représenter, ne pourront nullement estre poursuyuis pour aucun payement de rançon, comme par ces presentes, Nous les auons deschargez & deschargeons de l'un & de l'autre, sans qu'ores ny à l'aduenir ils en

puissent estre recherchez, molestez ny inquietez  
en quelque sorte & maniere que ce soit.

#### XLV.

Seront restituez de part & d'autre, tous titres, papiers & enseignemens qui pourroient auoir esté pris dans les Maisons & Chasteaux particuliers, sans qu'ils puissent estre retenus, pour quelque cause & pretexte que ce puissent estre.

#### XLVI.

Toutes prises qui auront esté faictes par mer durant le present mouuement, en vertu des congez & adueuz donnez par les Chefs de part & d'autre sur ceux de party contraire, & qui auront esté iugez par les iuges de l'Admirauté, ou autres Officiers à ce commis, demeureront assoupis sous le benefice du present Edict, sans qu'il en puisse estre faict aucune poursuite, ny les Capitaines & leurs cautions, bourgeois & aduitailleurs & lesdits Iuges & officiers recherchez & molestez en quelque façon que ce soit: Comme aussi, nous voulons que tous ceux qui auront obtenu congé de nostredit Cousin pour aller sur mer, & qui avec iceux seront jà partis, soient deschargez de toutes les prises qu'ils ont faictes ou pourront faire en vertu d'iceux, pendât le temps de trois mois apres la datte des presentes, tout ainsi qu'ils feroient s'ils auoient eu congé de nous, ou de nostre Cousin l'Admiral, dont les iugemens se feront par les Officiers ordinaires de nostre Admirauté, ou autres à qui la cognoissance en appartient.

#### XLVII.

Nostredit Cousin le Prince de Condé fera

mettre incontinent apres la publication de la paix dans les prouinces, les villes & places de Chasteau-Thiery, Espernay, Tonnecharante, Damaian, & generally toutes les autres villes, places & Chasteaux, que luy, ou ceux qui sont assiste par luy, & se sont ioincts avec luy tant Catholicques que de la religion pretendue reformée ont prises pendant ces mouuemens, & ce entre les mains de ceux qui les auoient en garde sans aucune en excepter: Comme aussi seront remis & restituez de part & d'autre toutes autres places, maisons & Chasteaux appartenans, soit aux Ecclesiastiques, ou aux Gentilshommes particuliers entre les mains des Seigneurs propriétaires d'iceux qui en iouyssoient auparauant cesdits mouuemens. Et pour le regard de Tartas, attendu qu'il a esté surpris sur le sieur de la Harie pendant la suspension d'armes, il sera presentement remis en ses mains, & deuant que l'on procede à la restitution des autres.

#### XLVIII.

Comme en semblable nous voulons & entendons que les Villes & chasteaux de Craon, Crel & clermont en Beauuoisis soient remis incontinent entre les mains de nostredit Cousin le Prince de Condé en l'estat qu'elles sont, & aussi les villes de Bryenne, Rosnay & Môtbron, entre les mains de nostre Cousin le Duc de Luxembourg à qui elles appartiennent, à la charge néantmoins de faire démolir les fortifications qui y pourroient auoir esté faictes pendant ces mouuemens si aucunes y

en a,

Nos Officiers tant Catholiques que de la religion pretendue reformee, qui ont demeuré es villes qui ont suivy & assisté nostre-dit Cousin, & qui à l'occasion de ce, ou en suite du present mouvement, n'ont peu payer le droict annuel de leur Offices dans le temps pour ce prefix aux bureaux qui en auoient esté establis, ou en leur deffaut leurs veufues, enfans ou heritiers seront receuz à payer ledit droict vn mois apres la publication du presët Edict, & en ce faisant iouyront du benefice dudit droict.

## L.

Et d'autant que pour subuenir aux grandes sommes de deniers qu'il nous conuient recouurer, tant pour le licenciement des gens de guerre qui sont sur pied de part & d'autre, & autres affaires de la guerre, seront les cinquante sols sur minot de sel qui auoient esté ostés en l'annee mil six cens dix, remis & reimpotez ainsi qu'ils estoient du viuant du feu Roy nostre tres-honoré Seigneur & Pere.

## LI.

Pour pareilles considerations seront reestablis les quarante sols qui se souloient leuer sur chacun quintal de sel en l'estenduë de la ferme de Lyonnois dicte à la part du Royaume,

## LII.

Comme aussi pour subuenir ausdites despeses, nous auons ordonné quelques droicts estre imposez & leuez sur les marchandises dont on transique sur quelques vnes des riuieres de cestuy nostre Royaume, afin de soulager d'autant le peuple de

la campagne, & de nos bonnes villes.

LIII.

Les Articles secrets qui auront par nous esté accordez, & qui ne se trouueront inferez en ce present Edict, serōt entretenus de poinct en poinct & inuiolablement obseruez, & sur l'extraict d'iceux, ou de l'un desdits articles signez par l'un de nos Secretaires d'Etat, toutes lettres necessaires seront expediees.

LIIII.

Et afin qu'il soit proprement pourueu à l'observation de nostre present Edict, mandons à nos amez & feaux Conseillers les gens tenans nos Cours de Parlement, qu'incontinent apres iceluy receu, & toutes choses cessans, ils ayent à le faire publier & enregistrer en nosdites Cours, selonc la forme & teneur, purement & simplement sans vser d'aucunes modifications ny restrictions, ny attendre autre iussion & mandement de nous, & à nos Procureurs en requerir & poursuyure incontinent & sans delay la publication: laquelle nous enioignons aux Gouverneurs & nos Lieutenans generaux de nos provinces, de faire pareillement faire chacun en l'estendue de sa charge, & par tous lieux & endroicts à ce faire accoustumez, & ce au premier commandement qu'ils en receurōt de nostre part, & sans attendre que ladite publication ayt esté faicte dans nosdites Cours de Parlement, à ce que nul n'en pretende cause d'ignorance, & que plus promptement toutes voyes d'hostilité, leues de derniers, payemens & contributions escheuz & à escheoir, prises demoli-

tions, & fortifications de villes, places & chasteaux cessent, declarans des à present icelles ieuees de deniers, fortifications, demolitions, cōtributions, prises de biens, meubles, & autres actes d'hostilité qui se feront apres la publication ainsi faicte par les prouinces subiectes à restitution, punition & reparation, à quoy nous voulons estre procédé contre les contreuenans. Sçauoir est contre ceux qui vseront d'armes, forces & violences, en la contrauention & infraction de cestuy nostre present Edict, empeschant l'effect & execution d'iceluy de peine de mort sās espoir de grace ny remission: Et quant aux autres cōtrauentions qui ne seront faictes par voyes d'armes, forces & violēces seront punis par autres peines corporelles, bannissement, amendes honorables, & autres, suivant la grauité & exigence des cas, à l'arbitre & moderation de nos Iuges & Officiers, ausquels nous en auons attribue & attribuons la cognoissance, chargeant en cet endroit leur honneur & conscience d'y proceder avec la Iustice & égalité qui y appartient, sans exceptiō ou difference de personne.

Si donnons en mandement ausdits gens tenans nosdites Cours de Parlement, Chambres de nos Comptes, Cours de nos Aydes, Baillifs, Seneschaux, Preuosts, & autres nos Iusticiers & Officiers qu'il appartiendra, ou à leurs Lieutenans, qu'ils fassent lire, publier & enregistrer cestuy nostre present Edict & Ordonnance en leurs Cours & Iurisdicitions, & iceluy entretenir, garder & obseruer de poinct en poinct, & du contenu en faire iouyr & vser pleinement & paisiblement tous

ceux qu'il appartiendra, cessant & faisant cesser tous troubles & empeschemens au contraire. Car tel est nostre plaisir. Et afin que ce soit chose ferme & stable à tousiours, nous auons fait mettre nostre seel à nostredit present Edict, sauf en autre chose nostre droit & l'autrui en toutes. Donné à Blois au mois de May, l'an de grace mil six cens seize. Et de nostre regne le sixiesme. Ainsi signé, LOY S. Et à costé visa, & au dessous, Par le Roy, estant en son Conseil, DE LOMENIE. Et seellé du grand seau de cire verte, sur lacs de soye rouge & verte.

*Leu, publié & enregistré, ouy & consentant le Procureur general du Roy, du tres-expres & reiteré commandement dudit Seigneur, aprestres-humbles remonstrances à luy faictes & reiterées sur les cinq, quatorze, quinze & cinquante-troisiesme articles, & sans tirer a consequence à l'aduenir pour la creation de l'office de Conseiller de la Religion pretendue reformee, mentionné au quinzieme article. A Paris en Parlement le 13. Iuin 1616. Signé, DV TILLET,*

*Leu, publié & enregistré en la Chambre des Comptes ouy, & ce consentant le Procureur general du Roy suyuant l'Arrest de ce iourd'huy vingt-huictiesme Iuin mil six cens seize.*

*Signé, BERTHELIN.*

*Leu, publié & enregistré en la Cour des Aydes, ouy, & ce consentant le Procureur general du Roy, aux modifications portées par l'Arrest du iourd'huy. A Paris le huictiesme Iuin mil six cens seize.*

*Signé, BERNARD.*

Extraict des Registres de la Cour des Aydes.

**V**EU par la Cour les chambres assemblees, les lettres Patentes du Roy en forme d'Edict, pour la pacification des troubles de ce Royaume, donnees à Blois au mois de May dernier, signees LOVTS, & plus bas, par le Roy, estant en son Conseil, De Lomenie, à costé visa, & scelees de cire verte sur lacs de soye rouge & verte, Articles particuliers accordez par sa Maie<sup>te</sup> estant en son Conseil, la Royne sa mere presente à Blois le sixiesme iour dudit mois de May, signees LOVTS, à costé visa, & plus bas, De Lomenie, attachez audit Edict, Conclusions du Procureur general du Roy: & tout consideré, LA COUR les Chambres assemblees, a ordonné & ordonne que lesdites lettres seront leües, publiees & registrees en icelle, à la charge que la leuee des cinquante sols sur minot & quarante sols sur quintal de sel mentionnez par icelles, n'aura lieu que pendant le temps de six annees, sans qu'elle puisse estre continuee pour quelque cause & occasion que ce soit, & sans approbation des lettres, breuets & traictez non verifiez en la dite Cour, en semblable des articles non inferez audit Edict contenus es articles quatorze, trente-neuf, cinquante-trois dudit Edict, & cinquiesme des articles particuliers at tachez à iceluy, insques à ce qu'iceux veuz & rapportez il en soit deliberé par ladite Cour: & pour le regard du cinquante-deuxiesme article dudit Edict la Cour dit qu'elle ne peut entrer en la verification d'iceluy, Prononcé le huietie<sup>me</sup> iour de Iuin mi six cens seize.

Signé.

BERNARD.

F.



gnitez, offices, & charges publiques quelconques Royales, Seigneuriales ou des villes, sera suiuy & obserué & en ce faisant les sieurs de Villemereau Conseiller en la Cour de Parlement, & le Maistre, Maistre en la chambre des Comptes, seront admis en la fonction de leurs charges comme ils estoient auparauant qu'il eussent fait profession de ladite pretendue Religion reformée.

V. Les Ministres de la Religion pretendue reformée iouyront de la grace & des exemptiōs à eux concédée par les lettres patentes du Roy, du quinziēme Decembre 1612.

VI. Les sieurs Durant, Louys & Gaufrin seront reſtablis en la ville de Mets, ainsi qu'ils estoient par cy-deuant.

VII. Les habitans de la ville de Millau, & des villes, bourgs, & communautēz du Comptē de Foix qui se trouuerent à la prise du Chasteau de Camerade, comme aussi quelques particuliers de la ville de Nismes, iouyront de l'effect des aboli-tiōs qui leur ont cy-deuāt esté octroyées pour aucuns crimes & exēcz y mentionnez, sans qu'il soit besoin d'autre verification que l'enregistrement qui sera fait des presens articles, & sans que ledit enregistrement puisse preiudicier aux interēsts ciuils des parties, pour lesquels ils se pouruoiront ainsi que de raison. Et pour le regard de la ville de Millau, les Catholiques tant Ecclesiastiques que autres y pourrōnt faire leur demeure & residence, & continuer le seruice dinin en toute ſeureté. Le Roy les mettant en la garde de ceux de la Religio pretendue reformée qui en demeureront respon-sables.

**VIII.** La dame Daudoux & le fleur de sainte roy, ensemble ceux qui les ont assistés demeureront entierement deschargez de tout ce qui leur peut estre imputé à cause de ce qui se passa à Belestat l'année 1615. Ce qui sera esteint aboly & supprimé, & sans que pour l'enterinement de la grace ou descharge qui en a esté ou sera expédiée, ils soient tenus se mettre en estat dont ils seront dispensés & deschargez à la charge aussi de l'intérêt civil s'il y eschet, & que les habitans qui font profession de la Religion pretendue reformée y pourront faire leur demeure en toute seureté & liberté, & y faire l'exercice de leur Religioñ selon qu'elle leur est permise par les Edits, lesquels demeureront en la garde des Catholiques.

**IX.** Le fleur d'Aradon sera réestably dans le gouvernement de la ville de Vannes, lequel rétablissement sera fait par le Gouverneur & Lieutenant general de la province.

**X.** La declaration qui a esté expédiée en faveur du fleur de Borne, au préjudice de la charge du grand Maistre de l'artillerie sera reuocquée, & ladite charge remise en la mesme autorité & fonction dont ont iouy les grands Maistres qui l'ont cy-devant exercée.

**XI.** Les fleurs Marquis de Bonniuet & de Friaize seront deliurez & mis en liberté & seront toutes informatiōs & procédures commencées à l'encontre d'eux, à cause & en suite des présents troubles nulles & de nul effect & valeur.

**XII.** Maistre Nicolas Cugnois Receueur provincial des decimes de Bourgongne en Bourgongne, demeurera deschargé, ensemble ses cautiōs &

certificateurs de la somme de 21. mil liures qu'il auoit esté contraint de payer & fournir à Monsieur le Duc de Mayenne tât des deniers de ladite recepte des decimes que de la consignation qu'il estoit pour suiuy faire au Chastelet de Paris, de la somme de sixmil quatre cens liures, pour le pris de la vente du dit office ou des années restâs à exercer d'iceluy, sans que pour ce ledit Cugnoys soit tenu de rapporter aucun procez verbal de ladite contrainte, dont il est dispensé, attendu la declaration que ledit sieur Duc de Mayenne a faicte d'auoir receu la dite somme de 21. mil liures dudit Cugnoys, & icelle employée aux affaires de la guerre, dont ledit Cugnoys demeurera vallablement deschargé enuers le Receueur general du Clergé de France: celui des consignations dudit Chastellet & tous autres en vertu de la quittance dudit sieur Duc de Mayenne, de ladite somme de 21. milliare qui seruira aussi de descharge audits Receueurs.

XIII. La commission qui a esté expédiée pour le razement du Chasteau de Tigny en Aniou, sera reuoquée si ià elle ne l'a esté.

XIV. Monsieur le Duc de Vendosme, ensemble tous ses domestiques, ceux de sa compagnie de gendarmes, & ceux de la compagnie de chevaux Legers qui a esté sous le tiltre de Monsieur le Duc de Mercure son fils, & qui a esté commandée par le sieur de la Vacre Chiuray, ensemble les sieurs *Marquis Doillan*, d'Aradon, Baron de Querue-nan, Baron de Vieux Chasteau, & les vesues & enfâs du sieur d'Oeruaux & du sieur de Camores, auront Euocation de tous les procez & differents tant ciuils que criminels qu'ils ont ou pourroient

5.  
auoir en deffendant en la Cour de Parlement de  
Rennes, & iceux procez seront renuoyez au grand  
Conseil, & ce pour vn-an, dont seront expediees les  
lettres d'euocation pour ce necessaires sous le cō-  
tresel desquelles sera attaché l'estat tant desdits dō-  
mestiques que desdites compagnies.

XV. Le Roy accorde à Monseigneur le Prince  
de Condé tant pour luy que pour les autres Princes  
& Seigneurs tant Catholiques que de la Religion  
pretenduë reformée qui se sont joincts & vnis avec  
luy la somme de quinze cent mil liures; tant pour  
le payement des leuées, entretenement & licentie-  
ment des gens de guerre, qu'autres frais & despée  
de ladite guerre.

Fait & arresté par le Roy estant en son Con-  
seil, la Royne sa mere presente, le sixiesme iour de  
May mil six cens seize. Signé Louys, Et plus bas  
Pothier, sous le contresel de l'Edict.